

至恆河沙劫講說是經，不如一念思惟入定。但使發心願坐禪者，已勝十方一切論師，何況得禪定者？論師白佛言：「我等多聞總持，講說無礙，十六大部，敬我如佛。世尊！何故不讚我等，獨讚禪定？」佛告諸論師：「汝等心亂，假使多聞，何所益也？汝欲與禪定角力，如盲眼人欲睹眾色，如無手足欲抱須彌、如折翅鳥欲飛虛空、如蚊子翅欲遮日月、如無舡舫欲渡大海，無有是處。汝等論師，亦復如是！」復次，《毗婆沙》中說：「若有比丘不肯坐禪，身不證法，散心讀誦講說文字，辨說為能；不知詐言知，不能詐言能，高心輕坐禪人。如是論師，死入地獄，吞熱鐵丸，出為豬羊雞狗等身。」

聲名無益之訓

《摩訶止觀》云：

昔鄴洛禪師，道播河海，住則四方雲仰，去則千百成群，隱隱轟轟，亦有何益？臨終皆悔，修行至此，審自斟酌。智力強盛，須棄利益。如其不然，且當安忍，深修三昧。行成力著，為化未晚。